

Dithero tsa Tirelano mo Kutlwanong

Thero ka Sontaga o o bidiwang Reminiskere, e le ka 04. 03. 2012
15/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 349 - 317/326

2. Thapelo: "Kriste, Kwana ya Modimo, yo o ntshang lefatshe dibeng, re tlhomogepe pelo! Kriste, Kwana ya Modimo, yo o ntshang lefatshe dibeng, re tlhomogepe pelo! Kriste, Kwana ya Modimo, yo o ntshang lefatshe dibeng, o re fe kagiso. Amen."

3. Epistolo ka fa thulaganyong ya 2 e kwadilwe mo go Baroma 5:1-11;
Efangele ka fa thulaganyong ya 1 e kwadilwe mo go Mareko 12:1-12.

4. A go ipolelwe tumelo ya bokeresete!

5. Sefela sa 91 - 84/86

6. Thapelo ya mmadi wa thero.

7. **Lefoko la thero** ka fa thulaganyong ya 4 e ntšha le kwadilwe mo go

Jesaya 5:1-7, le re: "A ko lo ntse ke opelele moratiwa wa me, ke opele sefela sa tsala ya me ka ga tshimo ya moweine ya gagwe: Moratiwa wa me o ne a na le tshimo ya moweine mo mmotong wa mmu o o bogale. A e lema, a olola matlapa, a tlhoma dithupana tsa moweine tse di tlhaotsweng mo go yona; a ba a aga serala mo gare ga yona, le gona a gaba segatelo mo go yona, a nna a lebelela a re: E tla ungwa maungo a a monate; mme ya ungwa masitlha a a botlha fela. Jaanong, baagi ba Jerušalema le banna ba Juta, a ko lo atlhole gare ga me le tshimo ya me ya moweine! Kana go ka bo go dirilwe eng gape mo tshimong ya moweine ya me se ke sa se dirang mo go yona? Ntlhaang ke ne ke lebeletse gore e tla ungwa maungo a a monate, mme e ungwele masitlha a a botlha fela? Jaanong he ke rata go lo itsise se ke tla se dirang ka tshimo ya me ya moweine: Ke tla tlosa logora lwa yona gore e nne mafulo, ke diga lorako lwa yona gore e gatakwe. Ke tla e senyetsa ruri, e se ka ya tlokoatlwa, e se ka ya tlhagolwa, mme go tlhoge mesu le ditshetlho teng. Ke tla laola maru gore a se ka a e nesetsa pula. Gonne tshimo ya moweine ya MORENA wa masomosomo ke ntlo ya Iseraele; ditlhatshana tse di mo natefelang ke banna ba Juta. O na a lebeletse tshiamo, mme a fitlhela tshokamo; a letetse tshiamiso, mme a fitlhela selelo." Amen.

8. Thero: Barategi mo Moreneng wa rona Jesu Keresete, re setse re simolotse sebaka sa dipogo, se e leng sebaka sa go gopola dipogo tse di bokete le loso lo lo boitshegang lwa Morena wa rona Jesu Keresete. Kajeno ke Sontaga wa bobedi mo sebakeng sa dipogo, o bidiwa Reminiskere. Ke gore gopola! Leina leo le ntshitswe mo Pesalomeng ya Sontaga wa kajeno, e le ya 25. Mo go yona re bona mafoko a a reng: "MORENA, gopola mautlwelobothoko a gago le maitshwarelo a gago, gonne a ntse a le teng ka bosenatshimologo." Phuthego, a le rona re gopole mo sebakeng se sa dipogo mautlwelobothoko a Morena le maitshwarelo a gagwe, a re a baakanyeditsweng ka dipogo le loso lwa ga Keresete mo sefapaanong, re eme fa tlase ga sefapaano, re tsholeitse matlho a rona, re mo lebe a ntse a bapoletswe mo sefapaanong ka ntlha ya maleo a rona; re be re mo kope gore a se ka a gopola maleo a bokau jwa rona, le e seng diphapogo tsa rona, mme a re gopole ka fa mautlwelongbothoko a gagwe, le ka ntlha ya maitshwarelo a gagwe.

Ke gona re lebisang matlho a rona mo mafokong a thero ya kajeno. Re a fitlhela a kwadilwe mo lokwalong lwa moporofeti Jesaya. Mo go ona re utlwa gore Morena a opela sefela sa moratiwa wa gagwe, a re: A ke opelele moratiwa wa me, ke opele sefela sa tsala ya me ka ga tshimo ya moweine ya me. Moratiwa wa gagwe o ne a na le "tshimo ya moweine mo mmotong wa mmu o o bogale. A e lema, a olola matlapa, a tlhoma dithupana tsa moweine tse di tlhaotsweng mo go yona; a ba a aga serala mo gare ga yona, le gona a gaba segatelo mo go yona, a nna a lebelela a re: E tla ungwa maungo a a monate; mme ya ungwa masitlha a a botlha fela." Ke gona go tlhagang potso ya gore tshimo e ya moweine e moporofeti a buang ka ga yona e ka nna mang? Karabo e re: Ke yona ntlo ya Iseraele. Morena wa tshimo eo ya moweine e go buiwang ka ga gagwe fano ke mang? Karabo e re: Ke ene MORENA WA MASOMOSOMO. Ke re: Re a gopola gore Morena o ne a itlhaolela morafe wa gagwe, e bong Iseraele, a baya leina la gagwe mo go ona, gonne o ne a rata batho ba gagwe, re mo utlwa a re: Tshimo ya moweine a e lema, a olola matlapa, a tlhoma dithupana tsa moweine tse di tlhaotsweng mo go yona gore o ungwe maungo a a monate, a ba a aga serala mo go yona gore a se ka a jewa ke dinonyane, a ba a gaba segatelo gore e tla re fa maungo a butswa, a gatellwe, metsi a moweine a ntshiwe. Ee, tota Morena wa tshimo ya moweine o ne a solofela gore maungo a tla nna a a monate a moweine, mme e ne e le masitlha a a botlha fela, e le maungo a a babang fela. Mafoko ao a a supa gore Morena wa tshimo eo ya moweine o ne a e tlhokomela tota, e bong morafe wa gagwe. Mme le fa go ntse jalo morafe oo o ne o sa utlwe molao wa gagwe, wa ikepa. Re utlwa moporofeti a supa ka thanolo gore batho bao ba tlogetse Morena, ba ikepa, ga twe: "Lona magodimo, utlwang; wena lefatshe, sekega tsebe! Gonne MORENA o bua a re: 'Ke otlile bana, ka ba godisa, mme bone ba ikepile mo go nna. Kgomo e itse morui wa yona, esele e itse segopo sa mong wa yona. Iserale ga a itse, morafe wa me ga o lemoge,'" Jes. 1:2-3.

Tshimo ya moweine ya Morena wa masomosomo ke ntlo ya Iseraele, le Bajuta ke dithupana tse di tlhaotsweng tsa moweine, tse di ratilweng. Morena o ne a lebeletse tshiamo, mma a fitlhela tshokamo, a letetse tshiamiso, mme a fitlhela selelo. Moporofeti o ne a lela ka ntlha ya bone ka tsela e e boifisang, e e tshosang tota, a re: A tatlhego wee mo go bone ba ba dirang bosula jo, le jo bongwe.

Ka moo Morena wa tshimo ya moweine, e bong MORENA WA MASOMOSOMO o botsa, o rata go utlwa mo go bone Bajuta le baagi ba Jeruſalema gore ke ka ntlha ya eng, fa ba ungwa masitlha a a botlha fela? A re: "Kana go ka bo go dirilwe eng gape mo tshimong ya moweine ya me se ke sa se dirang mo go yona? Ntlhaang ke ne ke lebeletse gore e tla ungwa maungo a a monate, mme e ungwile masitlha a a botlha fela?" Le fa ba ne ba sa arabe, karabo e utlwala, e re: Bosula jo ba latlhwang ka ntlha ya jona ga bo tswe mo Moreneng wa tshimo ya moweine, ga bo tswe mo Modimong, mme bo tswa mo go bone ka bosi. Modimo o ba diretse tse di molemo fela gore ba ungwe maungo a a monate, mme bone ba ne ba ikepa, ba tlogela Modimo. Mo boemong jwa maungo a a monate ba ungwile masitlha a a botlha fela.

Phuthego, go a bonala gore nako ya tlhabologo e a fela. Morena wa tshimo ya moweine o athola ka tsona tse a tla di dirang mo tshimong ya moweine ya gagwe, a re: "Ke tla tlosa logora lwa yona gore e nne mafulo, ke diga lorako lwa yona gore e gatakwe. Ke tla e senyetsa ruri, e se ka ya tlokotlwa, e se ka ya tlhagolwa, mme go tlhoge mesu le ditshetlho teng. Ke tla laola maru gore a se ka a e nesetsa pula." Ke re: Ka mafoko ao go bonala gore nako ya bopelotlhomogi e setse e fedile mo go yone tshimo eo. Tsholofelo ga e tlhole e le teng. Tshimo ya moweine e e neng e sa ungwe maungo a a batlegang e tla senyega, morafe wa gagwe o o neng o sa ungwe maungo a Morena a a batlang o latlha ka petso e e leng tatlhago le loso lo lo sa khutleng.

Bomorwa le bomorwadie-Rre, mafoko ao a raya rona ba kajeno. Ke re: Le rona ka kolobetso Modimo o re amogetse gore re nne tshimo ya moweine ya ona, re nne morafe wa ona, bana ba ona. Le rona Modimo o a re rata, o a re tlhokomela, jaaka morena wa tshimo ya moweine a tlhokomela yona. Modimo o re otlha ka Lefoko la ona, le ka disakramente tse di boitshepo tsa ona kwa o re fang teng boitshwarelo jwa maleo gore re ungwe maungo a a monate, mme le mo go rona kajeno go na le ba ba ikepang. Go na le ba ba tsamayang ka ditsela tsa bone, ba fapaana le ditaolo tsa ona.

Ee, le rona Morena o re godisitse jaaka bana ba gagwe, mme ra mo tlogela. "Kgomo e itse morui wa yona, esele e itse segopo sa mong wa yona!" Mme rona ga re itse, ga re lemoge. Go ntse jalo le mo dikgosing le mo babusing ba lefatshe le. Morena o lebeletse mo go bone tshiamo, mme ka ntlha ya dituelo, ba e fetotse go nna pateletso, a letetse tshiamiso, mme a fitlhela selelo. A tatlhago ya bone wee ba ba dirang tse di ntseng jalo!

Morwa-Rre, Morena wa masomosomo o botsa mo go wena kajeno gore go dirwa ke eng, fa o ungwa masitlha a a botlha fela? A re: Kana go ka bo go dirilwe eng gape mo go wena, tshimo ya me ya moweine, se ke sa se dirang mo go wena? Ntlhaang ke ne ke lebeletse gore o tla ungwa maungo a a monate, mme o ungwile masitlha a a botlha fela?

Ka moo wena yo o iseng o tlhabologe, yo o iseng o kolobediwe, le wena, moikepi, leboga, gonne mo go wena nako ya boikwatlhao le tlhabologo e sa ntse e le teng, mo go wena ga go a nna jaaka mo go Baiseraele le mo baaging ba Jeruſalema, mo go bone tsholofelo e ne e sa tlhole e le teng, ba ne ba lebelela katlholo ya go latlha le go senngwa fela, mme mo go wena, le fa go ise go bonale maungo a a monate, go sa ntse go tlhagolwa mo go wena, go sa ntse go tshelwa motshotelo wa Lefoko la Modimo. Ka gongwe o tla ungwa maungo mo go le le tlang, mme fa go sa dirafale, le mo go wena go tla tloisiwa logora gore o jewa, lorako lwa gago lo digwe, o tle o gatakwe, o senyediwe ruri, o se tlhole wa tlokotlwa, o se tlhole wa tlhagolwa, go be go tlhoge mesu le ditshetlho fela mo go wena, Modimo o laole maru gore a se ka a go nesetsa pula, o tle o kgaolwe, o latlhelwe mo moleteng wa molelo.

Tsala ya me, o sa ntse wa utlwa mafoko ao. O se diege, o se ka wa bua wa re: Ke tla bona kamamoso. Kajeno o bileliwa mo tlhabologong le mo boitshwarelong jwa dibe. Itlhaganele, baakanya tsa gago le Modimo, kajeno o sa ntse wa tshela. Itlhaganele, inele mo go Jesu Keresete yo o neng a swela maleo a gago. Ene ga a rate loso lwa me, ga a rate loso lwa gago, mme o rata gore batho botlhe ba pholosiwe ka go dumela mo go ene.

A Modimo Rara wa rona yo o mo legodimong a re thuse rotlhe, a re fe Mowa o o Boitshepo wa gagwe gore e tla re re sa ntse re utlwa mafoko ao, a re ame mo dipelong gore re lemoge gore le mo go rona le fa a lebeletse maungo a a monate, re ungwile masitlha a a botlha fela, re tle re kope mo go ene gore a re fe tlhabologo, re ungwe maungo a a monate, gore e tle e re ka letsatsi la thobo go fitlhelwe maungo a a monate mo go rona, e nne botshelo jo bo sa khutleng. Amen.

9. **Thapelo:** Morena Modimo Rara yo o mo legodimong, re a leboga, re lebogela Lefoko le le boitshepo la gago le re tswang go le utlwa. Morena, re tla mo go wena, re le tshimo ya gago ya moweine. Re itse gore le mo go rona o lebeletse maungo a a monate, mme re ungwile masitlha a a botlha fela. Morena, re a go kopa, re re: A o ko o re itshwarele maleo otlhe a rona ka bopelotlhomogi jwa gago. O re thuse, o re fe tlhabologo, gore e tla re Keresete a bowa ka letsatsi la bofelo a re fitlhele re le ba ba ungwang maungo a a monate, a re kgobokanye mmogo le baitlhaoledwi botlhe ba gago, a re tsenye mo botshelong jo bo sa feleng jo o bo re baakanyeditseng ka loso le tsogo ya ga Morwao Jesu Keresete Morena Morepholosi. Amen.

Thapelo ya Morena: Rara wa rona yo o mo legodimong ...

10. Sefela sa 165 - 147/150

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke F. J. Mtshali, ka ngwaga wa 1993.

Kgatiso le go rongwa ga dithero tseo go tshagediwa ke kopano e e bidiwang The Lutheran Heritage Foundation.